

Forico Sechi

TERRA MORTA

*Premio speciale della Giuria (Logudorese)*

Fruliade sas falches, fruliade,  
manigadores de pane e chibudda.  
Como su 'e messare hazis messadu,  
in custa terra morta... Terra morta!

Fruliade sas falches, e in sas carres  
bestide, torra, sa ruza camija  
chi cuet sas inghettas de su sole,  
su mossu de su sede in sas pettorras.  
Sezis messende sonnoss austidos,  
a sas caldanas de soles d'Austu,  
s'anima fruliende in sos restujos.  
Cantones senza briu sun sas bramas  
chi arrughidas bos morin in bula  
e d'est fritta sa falche  
e frittu est su suore  
chi si che surzit custa terra morta!

Sezis messende mattulos de pena  
e los sezis lighende cun s'ispera,  
pro fagher un'arzola de piantu,  
'ue su ranu già fattu zenina,  
misciu a sa paza che sulat su 'entu  
in custa terra morta. Si che sun andados  
tottu, e che sun addae. Bois solu  
sezis in cue, a messare chimeras.  
Sezis in cue a regoglier su nudda,  
su nudda de sa terra abbandonada  
chi si sentit traita, e chi isettat  
sa festa 'e sa torrada,  
sa festa antiga 'e sas arzolas mannas!

In su trighinzu de giannas serradas,  
 sas coberturas 'nde sunu ruende.  
 Una 'ezza, incrispida, isdentigada,  
 che-i sa morte est restada a sa sola  
 in su giannile, e isettat e narat:  
 «Fruliade sas falches, fruliade,  
 manigadores de pane e chibudda...  
 Como su 'e messare hazis messadu,  
 in custa terra morta, terra morta!».

### TERRA MORTA

Gettate via le falci, gettatele via, voi che mangiate pane e cipolla ormai più nulla avete da mietere in questa terra morta, terra morta!...

Gettate via le falci, gettatele via, coprite le carni con la rozza camicia che nasconda le impronte del sole e il morso delle spighe nel petto. Mietete sogni abortiti alla caldane d'agosto buttando l'anima tra le stoppie. Canzoni senza gioia son le brame che rauche vi muoiono in gola ed è fredda la falce, è freddo il sudore che assorbe questa terra morta.

Mietete fastelli di pena legandoli col filo della speranza per raccogliere pianto tra le mani là, dove i chicchi, già mondiglia, tra la paglia sono dispersi dal vento, in questa terra morta... Terra morta!

E' terra morta! Sono partiti. Sono andati lontano... e solo voi siete rimasti a mietere chimere. Siete rimasti a raccogliere il nulla, il nulla di una terra deserta che si sente tradita e aspetta la gioia del ritorno, l'antica festa dei grandi raccolti!

Mostrano i tetti cadenti le case bianche del borgo. Una vecchia grinzoza, senza denti è rimasta sola come la morte e sul limitare della soglia aspetta e mormora: «Gettate via le falci, gettatele via, voi che mangiate pane e cipolla... ormai più nulla avete da mietere in questa terra morta, terra morta!...».